

Laks 2 (Blaie än tåle): Awt fõtjbålplåts

Mansche, deer as je diling wider fåli wat lüüs awt fõtjbålplåts. Paul än Emma spaale ma da oudere bjarne. Di dräng as tiin iir üülj än jü foomen as nüügen. Tufel, Emmans latje hün, as uk deerbai. Dåt wääder as fain, jü uursluft as ål rucht wurm än da jarste oocht gööle schrubföögle fladere uk ål ambai. Ja säke da figeläte bloosme foon da uurskröle. "Laker, laker"! Emma än Paul kiike tu än fröie jam.

Fjouer oudere bjarne spaale fõtjbål awt gräin gjars. Thade stoont önjt toor. Hi heet di suurt-wite båle gram. Da oudere hiitje Enken, Momme än Sören. Ja hääwe diling gööle, rüüdje än weene särke ma korte sliiwe önj.

E famiili foon Sören kamt üt et dånsh. Ouers ja booge ål sunt dorti iir önj tjüschlönj. San taatje årbet önj en grut stää önj en bånk. Sin mam as schöljmäister önjt grünschölj. Sören koon tjüsch, dånsh än frasch snååke.

Tufel wal uk fõtjbål spaale. San båle as gööl än rüüdj. Awäädrie fäit'r en pår hünekaaåge.

Paul än Emma hääwe diling weene bukslinge önj. Ouers Emma heet en gräinen switer önj än Paul heet en weenen switer önj.

Dåt nai hoolthüs aw e rucht sid as rüüdj än heet en wit döör än en paksuurten tååge. Deer booget Emma än deer booget uk Momme ma sin famiili. Sin brün kåt håt Muusch än heet fjouer latje junge. Jü kåtefamiili spaalt fernäid awt gjars fort hüs än kiiket naischäri oer tut fõtjbålplåts.

Aw e leeft sid stoont dåt grut hüs, weer Paul booget. Et as ma gööl än rüüdj fårw önjmååld. Fort hüs stönje twäär woine. Di iine as rüüdj än di oudere woin as gräin. Di rüüdje woin hiirt da ålerne foon Sören. Bål wan's deerma eeftert dånsh kääre än åålen än åten besåke.